

Humphrey Thijsen papiando di e proyecto anuncia dor di Minister Oduber pa Cura Cabay

Nos a papie, pero nunca nos a imagina cu e lo bin y awor e ta bira realidad



ORANJESTAD (AAN):

Humphrey Thijsen un di e representanenan di piscadornan di Cura Cabay cu tabata presente durante e presentacion di e proyecto di mehoracion di beach y facilidadnan pa e area di pier di Cura Cabay/Zeewijk a indica cu semper nan a warda, cu semper nan a ser laga atras, pero awor e luz chikito den horizonte awor a yega cerca.

Su opinion ta cu pa añanan nendenan a bin y bay y nada a wordo haci, pero Minister Oduber a mostra e atencion di su banda y nan di nan banda a ricibi esey tambe. Awor nan lo reuni cu e piscadornan na e rancho cu tin eynan y lo informanan cu dentro di poco nan lo wak un bista completamente diferente di loke tin na e momentonan aki.

Humphrey ta bisa cu loke por mira den barionan pafor ya caba ta algo grandi y Cura Cabay lo mira algo bunita tambe pa e bario, pasobra no solamente nan lo haya un pier, un rancho cu nan a pidi, pero algo mucho mas grandi. Awor nan tur hunto mester duna man pa bay mantene

tambe.

“Esaki ta algo cu e bario mester...nos ta wak cosnan ta andando. Di chikito cu nan a cuminsa den 3 año di tempo nan a cuminsa crece y awor aki mi ta wak cu ...nos no a spere, mi tin cu bisa esaki, nos a papie, Minister Mike de Meza a yega di bisa un biaha cu esaki lo ta un bon lugar pa un facilidad cu hendenan por cana, nan por usa e beach pa hopi cos, pero nunca den nos pensamiento a bini cu e ta bay wordo realiza y awor mi ta bisa cu e ta algo netjie. Mi ta contento y mi ta kere cu e bario completo lo keda contento over di esaki ora nan tende e noticia”, Humphrey Thijsen a duna di conoce.

